



Kalaallit Nunaanni aalisarnermi pisarineqartut isumalluutini atuinermut akitsuutaat pillugit Inatsisartut inatsisaattut siunnersuut

(Aningaasaqarnermut Naalakkersuisoq)

(Siullermeerinnineq)

Naalakkersuisut Kalaallit Nunaanni aalisarnermi pisarineqartut isumalluutini atuinermut akitsuutaat pillugit Inatsisartut inatsisaannut allannguutissamik saqqummiussipput. Allannguutit - aamma inatsisip oqaasertaani erseqqissaassutini pingasunik aamma imaqarpoq. Allanguummi siullermi allanngortinniarneartoq tassaavoq aalisakkat ilaat avammut tunisassiarineqartartut akitsuusersortarnerannik allannguinnissaq. Allanguutip aappaani kissaatigineqarpoq aalisakkat aalajangersimasut akitsuutaasa peerneqarnissaat. Allanguutit pingajuanni sinerissamut qanittumi qaleralinniarnermi akitsuutit appartinneqarnissaat pineqarpoq.

Aalisakkat ilaannut avammut tunisassiarineqartartunut akitsuutip takutippaa aqqissuussinermi atuisarneq naleqarnerulersitsisarnerlu minningorsinnaasut. Taamaattumik Naalakkersuisut kissaatigaat naatsorsueriaatsimik allanngortitsinissartik. Taamatut allannguinnikkut akitsuummik minnermik akileerusuinnarluni aalisakkat naleqarnerulersimangitsut avammut tunisassiarineqartarnerat pinngitsoortinneqarsinnaangussagalarpoq. Demokraatini isumaqatigaarput akitsuutit imatut iluseqassanngimmata iluanaarniapiluttoqartassalluni inuiaqatigiit aningaasarsiornerat innarlerlugu. Taamaattumik Demokraatini allannguutissatut siunnersuut isumaqatigaarput.

Allannguutip aappaani saattuat uiluillu akitsuutaat Naalakkersuisut atorunnaarsinniarpaat tassanilu tunngavilersuutigineqarpoq aalisakkat takku aalisarneqarneri akilersinnaasariaqartoq. Demokraatini taamatut naliliineq aamma isumaqatigaarput. Akitsuutit aalisarneq tamanna artukkeqqavaa immikkoortumilu aningaasaliissuteqarnerusinnaaneq akorngusersorlugu. Aningaasaliinissaq



periarfissaasariaqarpoq aamma aalisarnej taanna ineriartortinneqarsinnaasariaqarpoq inuiaqatigiit aningaasarsiornerannut iluaqutaasumik. Akitsuutip ineriartornissaq tamanna akimmisaartippaa taamaattumik atorunnaarsinneqartariaqarpoq.

Allanguutissap pingajuanni sinerissap qanittuani qaleralinniarnermi akitsuut appartinniarneqarpoq, aalisarnermi tassani - angallatitut tunisassiortut - sinerissap qanittuani aalisartut, pisaminnik suliarinninnermikkut nalittorsaanissamut periarfissaqanginnerat tunngavigineqarpoq. Demokraatini taama naliliineq aamma isumaqatigaarput. Akitsuut pissutaalluni atukkat assingiingillat taamaasillunilu aamma unammilleqatigiinneq naligiinngitsumik ingerlanneqarpoq. Eqimattat aalajangersimasut allanut naleqqiullugit annerusumik ersutsinneqarput. Tamanna peertariaqarpoq.

Uani qinigaaffimmi aalisarnermut inatsit nutaaq suliarineqartussaavoq.

Demokraatini isumaqarpugut inatsit nutaaq inuutissarsiornermik tunngaveqartariqartoq - ingerlatsisunik - pissutsunik taamaasillunilu suliassanik periarfissanillu. Inatsit nutaaq aamma mannakkut inatsimmut atuuttumut naleqqiullugu allarluinnaassaaq. Inatsimmi massakkut atuuttumi tunngavigineqarpoq pisortat allaffeqarfiata isumaa naapertorlugu inuutissarsiummut suna naapertuunnersoq aamma inuiaqatigiinnut. Kisianni allaffiup inuutissarsiummi unamminartut periarfissallu tamaasa takorloorsinnaanngilai aamma taamaattumik aalisarnermut inatsit aqqeqattaartuarparput. Tamanna pissutaalluni aalisartut naatsorsuutigisinnaanngilaat inatsit ullumi atuuttut aamma aqagu atuutissanersoq. Qulalersitsisarpoq aamma pisuussutitta uumassusillit atorluarnissaannut siuarsaataanngilaq. Pissuseq taanna allangortittariaqarparput aalisarnermut inatsisiliornitsinni.

Kalaallit Nunaat sinaakkutissamik inatsiseqartariaqarpoq inuutissarsiutip siuariartuutigisinnaasaanik. Pisariaqarpoq inatsisip ingerlatsisut atungaannik tunngaveqarnissaa. Tamatumap inuiaqatigiit aningaasarsiornerat naggataatigut iluaqusissavaa. Inuutissarsiortut namminneq nalilerluarsinnaaneruaat pisuussutut qanoq pitsaanerpaamik atorneqarsinnaanersut inuiaqatigiinnut naleqarnerpaat pissarsiarineqassappata.

Qularutigineqassanngilaq Demokraatini politikkerigatsigu, pisuussutit uumassusillit nunap pigisarigai. Pisuussut nunap sapinngisamik annerpaamik iluaqutissarsivigisariaqarpaa.

Taamaattumik Kalaallit Nunaata nutaamik inatsisiliornermut atatillugu isigisariaqarpaa periuseq nutaarluinnaq, naapertuuttoq, paasiuminartoq aamma inuiaqatigiit aningaasarsiornerannut pitsaanerpaasusaaq.



Pisassiissutininik pissarsinissamut aallaavimmi tunngaviusariaqarpoq qanoq naleqarnerannut aalisartut isumaat aamma tamanna pisariaqarpoq periuseq kaattaassisarnermut assersuunneqarsinnaasoq atorlugu, soorlu Savalimmiuni eqqunneqarnikoq. Savalimmiuni kaattaassineq atorlugu aalisartut pisassiissutininik pisisarput. Ilinniarfiginnaavagut nunami maani. Aaqqissuussineq assigusoq atorlugu aaqqissuussinermik naapertuuttumik paasiuminartumillu atuilersinnaavugut peqataanik inuiaqatigiinnut pitsaanerpaamik iluanaartitsisussa.

Taamatut oqaaseqarluta immikkoortoq suliareqqitassanngorlugu Aningaasaqarnermut Akileraartarnermullu Ataatsimiititaliamut innersuupparput.